

大同府志

大同府志卷之二十一

大同府知府吳輔宏纂輯

人物^上

雲中古稱奧區恒山桑水環帶蟠結固冀北一大都會也 十步之澤必有芳草名山大川實產殊尤亦其地氣使然矣大同人物歷代多以武功顯而名臣循吏博雅文學之士時或表見於其間我

國家聲教四訖才喆蒸蒸向風忠孝大節如任勇烈父子韓一歐周于道兄弟尤卓卓不可磨滅者其他仁讓信義一節見重於里黨與夫懷協道藝旅遊僑寓諸人苟

大同府志

卷之二十一

人物

一

非碌碌亦何可泯沒也並次其行事附諸簡末云志人物

漢

馮唐其先趙人父徙代又徙安陵唐以孝著爲郎中署長事文帝帝輦過問唐曰父老何自爲郎家安在具以實言且尚論頗牧事帝大悅先是雲中守魏尚坐上功首差六級下之吏削其爵以唐言卽曰令持節赦魏尚復爲雲中守而拜唐爲車騎都尉主中尉及郡國軍士十年景帝立以唐爲楚相武帝卽位求賢良舉唐唐時年九十餘不能爲官乃以子遂爲郎遂字王孫亦奇士

李沮雲中人事景帝武帝立十七歲以左內史爲彊弩將軍後一歲復爲彊將軍從大將軍青出塞有功賜爵關內侯

郭昌雲中人以校尉從大將軍青元封四年以大中大夫爲拔武將軍屯朔方

趙綰代人嘗受詩申爲御史大夫與蘭陵王臧請立明堂以朝諸侯不能就其事乃言師申公武帝使使束帛加璧安車以蒲裏輪駕駟迎申公至以爲大中大夫舍魯邸議明堂事實太后得綰臧之過以讓上曰此欲復爲新垣平也上因廢明堂事下綰臧吏皆自殺

大同府志

卷之二十一

人物

二

裴雲中人爲燉煌太守光武旣得河西四郡召見郡邑吏以遵爲賢從征帝旣還命遵率偏師從大司馬吳漢等討公孫述定地有功卒祀於鄉

范升字辯卿代郡人也少孤依外家居九歲通論語孝經及長習梁邱易老子教授後生王莽大司空王邑辟升爲議曹史時莽發兵役徵賦繁興升乃奏記於邑邑雖然其言而竟不用升稱病乞身邑不聽令乘傳使上黨升遂與漢兵會因畱不還建武二年光武徵詣懷宮拜議郎遷博士上疏曰臣與博士梁恭山陽太守呂腔俱修梁邱易二臣年並耆艾經學深明而臣不以時退

慙負二老無顏於世誦而不行知而不言不可開口以爲人師願推博士以避梁呂帝不許然由是重之數詔引見每有大議輒見訪問後還鄉里永平中爲聊城令坐事免卒於家

殷謨字君長鴈門人與太原周黨譚賢俱守節不仕王莽世建武屢徵並不至衛嵩代郡人明帝時以儒學徵

周康子定襄人邱季智郝禮眞雲中人爲介休郭林宗所識拔並以成名

程緒代郡人爲幽州牧劉虞從事初平四年冬虞自率諸屯兵衆合十萬人以攻公孫瓚將行緒免胄而前曰公

大同府志

卷之二十一

人物

三

孫瓚雖有過惡而罪名未正明公不先告曉使得改行而兵起蕭牆非國之利加勝敗難保不如駐兵以武臨之瓚必悔禍謝罪所謂不戰而服人者也虞以緒臨事沮議遂害之

韓珩字子佩代郡人清粹有雅量少喪父母奉養兄姊宗族稱孝弟焉爲幽州別駕袁氏將焦觸驅率諸郡太守令長背袁向曹陳兵數萬盟曰違者斬衆莫敢仰視各以次軟珩曰吾受袁公父子厚恩今其破亡智不能救勇不能死於義闕矣若乃北面曹氏所不能爲也一坐失色觸曰事之濟否不待一人可卒珩志以厲事君魏

武聞珩節甚高之屢辟不至卒於家

張楊字稚叔雲中人以武勇給從事并州靈帝未爲假司馬屬西園上軍校尉獻帝初以爲河內太守拜安國將軍封晉陽侯欲迎帝自河東還洛諸將不聽建安元年車駕還舊京楊以糧迎道左拜大司馬性仁和馭丁無威刑謀不軌者發覺輒對之涕泣不問卒爲部將楊醜

所害

省志舊志俱不載按三國志本傳楊欲迎天子還洛後復以糧迎道路臣節不虧雖魏畧稱其仁和无威刑卒以取敗要亦仁者之過故欲削而仍存之

晉

秦秀字元良新興雲中人也父朗魏驍騎將軍秀少敦學

大同府志

卷之二十一

人物

四

行以忠直知名咸寧中爲博士何曾卒下禮官議諡秀議宜諡繆醜公時雖不同秀議而聞者懼焉秀性忌讒佞疾之如讎素輕鄙賈充及伐吳之役聞其爲大都督謂所親曰充文案小才乃居大任吾將哭以送師及孫皓降於王濬充未知之方以吳未可平抗表請班師與濬告捷表同至朝野以充位居人上智出人下僉以秀爲知言後與劉暉等同議齊王攸事忤旨除名尋復起爲博士秀性悻直與物多忤爲博士前後垂二十年卒於官

劉殷字長盛新興人也高祖陵漢光祿大夫殷七歲喪父

哀毀過禮服喪三年未嘗見齒曾祖母王氏盛冬思董
而不言不飽者一旬矣殷怪而問之始言共故殷時年
九歲乃於澤中慟哭忽若有人云止聲殷收淚視地便
有董生焉又嘗夜夢人謂之曰西籬下有粟寤而掘之
得粟十五鍾時人嘉其孝感弱冠博通經史有濟世之
志州郡屢徵不赴齊王攸征南將軍羊祜召參軍事皆
以疾辭同郡張宣子勸殷就召殷以應命不得就養對
宣子曰識量如子當爲吾師矣遂以女妻之及王氏卒
殷夫婦毀瘠幾滅性時柩在殯而西鄰失火殷叩殯號
哭火遂越燒東家後有二白鳩巢其庭樹自是名譽彌

大同府志

卷之二十一

人物

五

顯太傅楊駿備禮聘殷殷以母老固辭趙王倫篡位以
散騎常侍徵之殷逃奔鴈門及齊王冏輔政辟爲大司
馬軍諮祭酒轉拜新興太守明刑旌善甚有政能有七
子五子各授一經一子授史記一子授漢書一門之內
七業俱興北州之學推爲獨盛以壽終

趙至字景眞代郡人寓居洛陽緱氏令到官至年十三與
母同觀母曰汝先世本非微賤爾後能如此否至感母
言詣師受業聞父耕叱牛聲投書而泣師怪問之至曰
吾小未能榮養使老父不免勤苦師甚異之年十四詣
洛陽游太學遇稽康於學寫石經徘徊視之不能去請

問姓名康曰年少何以問耶曰觀君風器非當所以問耳康異而告之年十六遊鄴復與康遇隨康還山陽改名浚字允元及康卒至詣魏興太守張嗣宗甚被優遇隨嗣宗到潁川欲因入吳而嗣宗卒乃向遼西而占戶焉至身長七尺四寸論議精辯有縱橫才氣遼西舉郡計吏到洛與父相遇時母已亡父欲令其宦弗之告仍戒以不歸至乃還遼西幽州三辟部從事斷九獄見稱精審太康中以良吏赴洛方知母亡初至欲以官學立名期於榮養既而其志不就號憤慟哭嘔血而卒年三十七

大同府志

卷之二十一

人物

六

魯勝字叔時代郡人也少有才藻爲佐著作郎元康初遷建康令到官嘗以冬至之後立晷測影準度日月星按日月裁經百里無千里星十里不百里表上求下羣公卿士考論不報嘗歲日望氣知將來多故便稱疾去官中書令張華遣子勸其更仕再徵博士舉中書郎皆不就

元魏

衛操字德元代人少通俠有才畧晉征北將軍衛瓘以爲牙門將當神元時頗自結附後與從子雄及箕澹等十數人來歸桓帝以爲輔相任以國事至右將軍封定襄

侯穆帝三年卒

賀訥代人道武皇帝之舅獻明后之兄也拜安遠將軍以元舅甚見尊重以壽終於家

賀悅訥從父弟以功賜爵鉅鹿侯進北新公卒子泥襲降肥如侯明元卽位詔與元渾等八人拾遺左右復與北新侯安同行并定二州州郡肅然後從征赫連昌以功進爵琅邪公軍國大議每參預焉卒於外都大官

劉羅辰代人宣穆皇后之兄也以功賜爵永安公除定州刺史卒諡曰敬

燕鳳字子章代人好學博綜經史明習陰陽讖緯昭成素

大同府志

卷之二十一

人物

七

聞其名使以禮迎之鳳不應聘乃命諸軍圍代曰燕鳳不來吾將屠汝代人懼送鳳昭成待以賓禮後拜代王左長史參軍國事又以經授獻明帝嘗使符堅堅問鳳代王何如人對曰寬和仁愛經畧高遠一時雄主也堅曰彼國人馬多少鳳曰控弦之士數十萬馬百萬匹堅曰卿言人衆則可說馬太多鳳曰雲中川自東山至西河二百里北山至南山百有餘里每歲孟秋馬常大集畧爲滿川以此推之使人言猶未盡鳳還堅厚加贈遺道武卽位歷吏部郎給事黃門侍郎行臺尚書甚見禮重明元世與崔宏封懿梁越等入講經傳出議朝政太

武初以舊勲賜爵平舒侯加鎮遠將軍神麿元年卒
許謙字元遜代人少有文才善天文圖讖之學昭成擢爲
代王郎中兼掌文記與燕鳳俱授獻明帝經從征衛辰
以功賜僮隸三十戶道武時爲右司馬以敗慕容寶功
賜爵關內侯并州平以謙爲陽曲護軍賜爵平舒侯安
遠將軍皇始元年卒官年六十三諡曰文

長孫嵩代人寬雅有器度年十四歸道武累著軍功後從
征中山除冀州刺史賜爵鉅鹿公歷侍中司徒相州刺
史封南平公所在著稱明元初與山陽侯奚斤北新侯
安同白馬侯崔宏等八人坐止車門右聽理度政世號

大同府志

卷之二十一

人物

八

八公宋武常假道伐姚泓明元假嵩節督山東諸軍事
宋武於舟中望嵩麾蓋遺以酃酒及江南食物嵩皆送
京師詔嵩厚答之又敕簡精兵爲戰備遂與叔孫建等
自成臯南濟晉諸屯戍皆望塵奔潰太武卽位進爵北
平王司州中正尋遷太尉加柱國大將軍自是輿駕征
伐嵩以元老多畱鎮京師平斷刑獄卒年八十諡曰宣
王孝文時配饗廟廷

長孫道生嵩從子忠厚廉謹道武愛其慎重使掌機密與
賀毗等四人內侍左右出入詔命明元時除南統將軍
冀州刺史太武卽位進爵汝陰公遷廷尉卿太武征赫

連昌道生爲前驅以克捷功除司空加侍中進封上黨王卒年八十二諡曰靖道生廉約身爲三司而衣不華飾食不兼味一熊皮鄣泥數十年不易時人比晏嬰第宅卑陋出鎮後子弟頗修繕道生還悉毀之所在著績每建大議多合時機爲將有權畧善待士衆帝命歌工歷頌羣臣曰智如崔浩廉如道生與從父嵩俱爲三公當世以爲榮

長孫肥代人昭成時年十三以選內侍少有雅度果毅少言登國初爲大將屢有戰功從平中山以功賜爵琅邪公遷衛尉卿改爵廬鄉時中山太守仇儒推趙準爲主

大同府志

卷之二十一

人物

九

肥討破準於九門斬仇儒擒準除肥鎮遠將軍兗州刺史姚平攻平陽徵爲前鋒平退還鎮兗州撫慰河南得吏民心威信著於淮泗善策謀勇冠諸將前後征討未嘗失敗故每有大事令肥當之南平西征肥功居多後降爵藍田侯天賜五年卒諡曰武

長孫翰肥子少有父風以善騎射爲獵郎明元卽位遷散騎常侍拾遺左右以功遷平南將軍鎮北境威名甚著太武卽位徵還京師進封平陽王加安集將軍尋遷司徒翰清正嚴明善撫將士神麇三年卒太武爲之流涕親臨其喪賻贈有加諡曰威弟陳位駕部尚書性寬厚

好學愛士所歷輒爲人思封吳郡公卒諡恭

尉古真代人登國初從征有功賜爵東州侯明元初爲鴻
飛將軍鎮大洛城泰常三年除定州刺史卒弟諾少以
忠謹著從圍中山賜爵安樂子明元時爲幽州刺史甚
有惠政後封遼西公延和中卒兄弟並爲方伯當世榮
之

尉眷諾長子忠謹有父風明元時爲大官令追擒侍臣受
斤以驍烈聞加陳兵將軍又爲安北將軍出鎮北境以
功封漁陽公後歷鎮四藩威名並著文成時拜侍中太
尉進爵爲王文成時以眷元老賜杖履上殿和平四年

大同府志

卷之二十一

人物

十

卒諡曰莊弟地干機悟有才藝馳馬立射五的時人莫
能及太武時位庫部尚書加散騎常侍奉上忠謹甚見
親愛叅軍國大謀時將出師試衝車干爲索所罣折脅
而卒帝甚悼之諡曰惠眷子多侯少有武幹仕至燉煌
鎮將征西大將軍

尉聿字成興古真族元孫性耿介孝明時爲武衛將軍時
領軍元義秉權百寮莫不致敬聿獨長揖不拜尋出爲
涼州刺史涼州緋色天下之最義送白綾二千疋令染
聿拒不受義諷御史劾之徵至京覆驗無狀還任尋卒

於州

長孫觀道生孫少以壯勇知名襲祖爵上黨王拜征西大將軍假司空督河西七鎮諸軍孝文初拜殿中尚書侍中後爲征南大將軍卒諡曰定

長孫稚字承業以字行觀子六歲襲爵降公初名冀歸孝文以其幼承家業賜名字焉聰敏有才藝虛心愛士爲前將軍從南征授七兵尚書太常卿右將軍宣武時領揚州刺史假鎮南大將軍都督淮南諸軍事梁將裴邃虞鴻襲據壽春詔河間王琛總衆援之琛欲決戰承業以久雨須持重琛弗從遂爲邃所乘承業後殿還爲大都督嗣以北征至呼沱承業未欲戰河間王琛不從敗

大同府志

卷之二十一

人物

十一

績與琛並除名尋復假鎮西將軍伐蜀都督頻戰有功除平東將軍復爵後除尚書右僕射詔以爲行臺討蕭寶夤時背疽未愈靈太后勞之答曰死而後已敢不自力及雍州平除雍州刺史孝莊初封上黨王尋改馮翊遷司徒公加侍中兼尚書令大行臺仍鎮長安節閔立遷太尉公錄尚書事孝武初轉太傅孝武入關承業時鎮虎牢亦隨赴長安位太師錄尚書事大統元年卒諡文宣子子彥有膂力累從父征封槐里縣子孝武以爲心膂後從帝入關大統七年拜太子太傅

穆觀字闡拔代人宜都公崇次子襲崇爵少以文藝知名

明元初爲左衛將軍綰門下中書出納詔命訪問舊事未嘗有遺漏以尚主拜駙馬都尉遷太尉太武監國爲右弼出則統攝朝政入則應對左右事無巨細皆關決焉終曰怡怡無愠色勞謙善誘不以富貴驕人泰常八年卒諡曰文成太武每於羣臣談晏歎爲自道武來佐命勲臣文武兼濟無及之者子壽明敏有父風太武擢爲下大夫敷奏機辨有聲內外遷侍中中書監領南部尚書進爵宜都王加征東大將軍辭太武嘉之眞君八年卒諡文宣

省志載穆氏自崇以下數人按魏書本傳崇雖屢建勲績後乃不終故敘諸穆當自

觀始舊志祇載崇而不
及觀亮諸人尤屬舛謬

大同府志

卷之二十一 人物

十二

穆亮字幼輔壽孫早有風度獻文時起家侍御中散尚主拜駙馬都尉加侍中封長樂王孝文時除征南大將軍領護西征校尉仇池鎮將時宕昌王梁彌博來奔亮以彌博兇悖請納其從兄彌承孝文從焉於是立彌承而還時有楊卜從軍二十一戰鎮將抑而不聞亮表卜爲廣業太守豪右咸悅境內大安徵爲侍中尚書右僕射於時復置司州尚書陸叡舉亮爲司州大中正後拜司空叅議律令尋領太子大傅及遷都加武衛大將軍以本官董攝中軍事帝南伐以亮錄尚書事畱鎮洛陽尋除使持節征北大將軍開府儀同三司冀州刺史宣武

卽位拜尚書令司空公卒諡曰匡

穆紹字永業亮子尚主拜駙馬都尉歷官秘書監侍中衛將軍太常卿中書令七兵殿中尚書母憂以孝聞又除衛大將軍左光祿大夫中書監侍中領本邑中正紹資性方重罕接賓客以功進侍中後謝事還家詔復除侍中託疾未起孝莊立尋授尚書令司空進爵爲王普定元年卒諡文獻

穆多侯壽弟歷位殿中給事左將軍司衛監乙渾專權召司徒陸麗麗時在溫湯療疾多侯曰渾有無君心司徒衆所望也去必危宜徐歸而圖之麗不從遂爲渾所害

大同府志

卷之二十一

人物

十三

多侯亦見殺諡曰烈

穆弼觀弟翰曾孫有風格善自位置涉獵經史與長孫稚陸希道等齊名孝文定氏族欲以弼爲國子助教辭俄會司州牧咸陽王禧入帝曰朕與卿作州督舉一主簿卽命弼謁之宣武初除尚書郎轉司州治中別駕歷任有稱後以慰諭河西功拜平西將軍華州刺史卒於州諡曰懿

穆顥崇第四子有材力以侍御郎勇冠一時遷侍輦郎殿中將軍後以功進爵出爲北鎮都將徵拜殿中尚書出鎮涼州所在著稱文成時爲鎮西大將軍坐事免官尋

以前勲復徵爲內都大官卒諡曰康

和跋代人以才辨知名道武擢爲外朝大人參軍國大謀
雅有智算拜龍驤將軍賜爵日南公以功進尙書鎮鄴
復以軍績改封定陵出爲平原太守寵遇冠於諸將
奚牧代人重厚有智謀道武寵遇之以告劉顯謀拜治民
長敷奏政事參預計畫加輔國將軍畧地晉川有功還
拜并州刺史賜爵任城公

庾業延代人賜名岳性恭慎修謹道武嘉之爲外朝大人
參預軍國拜安遠將軍以功賜爵西昌公遷鄴行臺岳
爲將有謀畧治軍清整常以少擊多士衆服其智勇及

大同府志

卷之二十一

人物

十四

罷鄴行臺以所統六郡置相州卽拜岳爲刺史公廉平
當百姓稱之鄴舊有園池時果初熟吏送之岳不受曰
果未進御吾何得先食其謹如此遷司空以候官誣告
見殺後太武經其墓詔爲立廟子陵從征有功詔襲爵
賀翟干代人世爲將以平當稱登國初與長孫嵩爲對明
於聽察爲人愛敬道武遣翟干致馬千匹結婚於姚萇
會萇歿興立因止翟干道武遙賜襄武侯加秦兵將軍
翟干在長安因習讀書史通論語尙書諸經舉止似儒
者後還帝見其言語衣服類秦以爲慕而習之因見殺
弟歸亦剛直方雅

舊志失載死非其罪未可與莫題等
並削且和跋奚牧諸人旣得載矣不

當自亂
其例

古弼代人少忠謹善騎射初爲獵郎門下奏事以敏正稱上嘉其直而有用賜名曰筆後改名弼言其輔佐才也令典西部與劉潔等分縮機要敷奏百揆太武卽位以功拜立節將軍賜爵靈壽侯歷侍中吏部尚書典南部奏事後征馮宏坐事黜爲廣夏門卒尋復爲侍中拜安西將軍鎮長安甚有威名及議征涼州弼言不宜行旣克姑臧帝以其有將畧弗之責假節督隴右諸軍討仇池楊保熾平之未幾楊文德復圍仇池弼攻解其圍文德走漢川時東道將皮豹子欲還軍弼使謂曰不如繕

大同府志

卷之二十一

人物

十五

兵練甲逸以待之豹子乃止太武聞之曰弼言長策也制有南秦弼謀多矣景穆總攝萬幾徵爲東宮四輔與宜都王穆壽等並參政事遷尚書令弼雖事務殷湊而讀書不輟端謹慎密口不言禁中事功名等於張黎嘗以陳奏遇帝與給事中劉樹碁侍坐良久不獲申聞乃捽樹頭掣下床以手搏其耳以拳歐其背太武奇弼公直皆可其奏弼曰爲臣逞志於君前非無罪也詣公車免冠徒跣自劾帝召之曰卿其冠履卿有何罪自今以後苟利社稷益國便民者雖復顛沛造次爲之無顧也又以出獵河西事太武歎曰有臣如此國之寶也賜衣

一襲馬二匹鹿十頭文成卽位與張黎並坐議不合旨
免被誣伏法

奚斤代人機敏有識度登國初 禁兵後爲侍郎從破慕
容寶於參合皇始初拜越騎林尉遷都水使者出爲晉
兵將軍幽州刺史賜爵山陽侯明元時爲鄭兵將軍明
元幸雲中斤畱守京師後大 東郊以斤行左丞相大
蒐於石會山車駕西巡詔爲 驅又詔與嵩等坐 車
門左聽理萬機進爵公太武時進爵宜城王太延初爲
衛尉改恒農王後爲萬騎大將軍涼州平以戰功賜僮
隸七十戶又賜安車以優異之斤聰辯彊識善談論遠

大同府志

卷之二十一

人物

十六

說先朝故事歷歷不爽每議大政多見從用朝廷由是
稱焉眞君九年卒年八十有九諡曰昭王

叔孫建代人少以智勇稱登國初爲外朝大人與安同等
十三人迭典庶事參軍國謀隨秦王觚出使還拜後將
軍累遷中領軍賜爵安平公出爲并州刺史以公事免
明元念前功以爲正直將軍相州刺史晉將王仲德入
滑臺詔建渡河曜威尋遷廣阿鎮將威名甚震久之除
使持節都督前鋒諸軍事楚兵將軍徐州刺史率衆自
平原濟河下青兗諸郡遂東入青州圍宋刺史竺夔於
東陽城以功賜爵壽光公太武以建威名南震爲宋所

憚除平原鎮大將封丹陽王加征南大將軍建沉敏多
智東西征伐常爲謀主治軍清整又雅尙人倫禮賢愛
士在平原十餘年綏懷內外甚著聲稱太延三年卒年
七十三諡曰襄

叔孫俊字醜歸建子少聰敏年十五內侍左右性謹密明
元時拾遺左右遷衛將軍賜爵安成公朱提王悅入禁
中俊覺舉動有異便引手掣之乃於悅懷中得兩刃七
首執殺之明元以俊前後功重委以軍國大計羣官上
事先由俊銓校後奏聞性平正柔和未嘗有喜怒之色
不諂上抑下奉詔宣外告示殷勤上下嘉歎泰常元年

大同府志

卷之二十一

人物

十七

卒諡孝元

按魏書列傳叔孫氏穆氏陸氏于氏尉氏長孫氏俱代有名人舊志全載陸俟子孫數十

人其他並從闕畧如叔孫父子世篤忠貞而書不及俊不特體例互異亦非所以昭世美也今照省志增入他皆倣此

婁伏連代人忠厚有器量道武初累功賜爵安邑侯明元
時爲晉兵將軍并州刺史太武卽位封廣陵公再遷光
祿勳帝車駕北征伏連畱鎮京師進爵爲王後以征西
將軍出鎮統萬卒諡曰恭兄孫安文子毅敷歷內外累
遷散騎常侍尚書右僕射以功加侍中出持征東將軍
定州刺史轉涼州刺史太和二十一年卒

邱堆代人美容儀以忠謹親侍明元時拾遺左右遷散騎

常侍與叔孫建等累奏戰功賜爵爲侯太武監國爲右
弼卽位進臨淮公加鎮西將軍徙太僕以宜城王奚斤
表留堆合軍進平昌斤敗堆走還長安帝怒戮之延和
初追錄舊勲詔賜其子跋爵淮陵侯舊志不載今增入
與賀翟干同例
娥清代人少有將畧累著戰功稍遷振威將軍拜給事黃
門侍郎明元南巡爲中領軍將軍與宋兵將軍周幾等
渡河畧地以功賜爵須昌侯鎮枋頭太武初還京師進
東平公轉宗正卿出鎮并州遷平東將軍後坐事黜免
卒於家

劉尼代人本姓獨孤氏曾祖敦有功爲方面大人父婁爲

大同府志

卷之二十一

人物

十八

冠軍將軍尼勇果善射太武善之拜羽林中郎賜爵昌
國子加振威將軍後封東安公尋遷尙書右僕射進封
王出爲定州刺史在州清慎徵爲司徒獻文以尼有大
功於先朝特加尊重延興四年卒

奚眷代人少有將畧道武時有戰功明元時爲尙書假安
南將軍虎牢鎮將太武初賜爵南陽公加使持節侍中
都督豫洛二州河內諸軍事尋徙鎮長安

來大千代人父初眞官至後將軍武原侯大千驍果善騎
射永興初襲父爵中散朝賀日常著御鎧盤馬殿前朝
臣莫不嗟嘆遷內幢將典宿衛禁旅用法嚴明上下齊

肅嘗從明元獵見虎在高巖上持稍直前刺之應手而斃帝嘉其勇壯太武初爲常侍持仗侍衛晝夜不離左右累從征伐以戰功遷鎮北大將軍賜爵廬陵公鎮雲中兼統白道軍事巡撫六鎮經畧布置甚得事宜卒諡曰莊

周幾代人少以善騎射爲獵郎道武卽位爲殿中侍御史掌宿衛禁兵斷決稱職遷左民尚書後爲寧朔將軍以拒晉功賜爵交阨侯太武以幾有智勇遣鎮河南威信懋著進號宋兵將軍卒於軍軍人歎惜之諡曰桓

豆代田代人明元時以善騎射爲內細射從攻虎牢登樓

大同府志

卷之二十一

人物

十九

矢不虛發以功遷內三郎拜勇武將軍賜爵長廣公加平東將軍轉太子太保出爲統萬鎮大將卒諡曰恭

周觀代人驍勇有膂力每在軍陣必應募先登以功賜爵安川子進都副將鎮雲中又從征平涼封金城公俄加散騎常侍轉高平鎮將觀善撫士卒號有威名尋除平南將軍秦州刺史後中流矢卒

尉撥代人父那濮陽太守撥爲太學生募從兗州刺史有功賜爵介休男進爵子累遷晉昌杏城鎮將綏懷著績文成以撥清平有惠政賜衣服獻文初爲北征都將破宋水軍拜懸瓠鎮將進安城侯轉平南將軍北豫州刺

史卒諡敬

陸眞代人父洛侯秦州刺史眞少善騎射膂力過人太武時拜內三郎眞君中以功賜爵關內侯後攻懸瓠登樓臨射城中弦不虛發擊破宋將王元謨于滑臺遂從駕至江還攻盱眙功居多文成初進都昌侯爲選部尚書遷安西將軍長安鎮將進河南公長安兵民素服其威信眞到撫慰皆帖然安靜在鎮數年甚著威稱卒諡烈子延有氣幹襲爵汝陽侯位至懷朔鎮大將太僕卿呂洛拔代人洛拔以壯勇知名文成時爲平原鎮都將隨尉元擊宋將張永等大敗之洛拔格戰二日手殺九人

大同府志

卷之二十一

人物

二十

奪運車二百餘乘牛二百五十頭賜爵成武侯卒子文祖補龍牧曹奏事中散超授陽平太守

于栗磾代人能左右馳射登國中拜冠軍將軍與寧朔將軍公孫蘭潛從韓信故道開井陘路道武謂栗磾曰卿吾之鯨彭也永興中受命征討所向皆平卽以本號畱鎮平陽轉河內鎮將賜爵新城男授黑稍將軍栗磾好持黑稍以自標故以名官尋遷豫州刺史進爵侯旋進爵爲公累遷使持節都督兗桓二州諸軍事鎮南將軍外都大官卒年七十五栗磾自少治兵迄於白首臨事善斷所向無前加以謙虛下士刑罰不濫太武甚悼惜

之子洛拔襲爵有姿容善應對拜侍御中散太武愛其恭慎恒在侍衛擢領監御曹事歷官鎮將刺史所在有能名拜侍中遷尚書令在朝祇肅百寮憚之太安四年卒

于烈洛拔長子善射少言有不可犯之色少拜羽林中郎累遷司衛監左衛將軍殿中尚書與元丕陸叡李冲等各賜金策進爵洛陽侯轉衛尉卿加征南將軍孝文遷洛敕鎮代畱臺度政一相參委車駕幸代執烈手曰宗廟至重翼衛不輕卿當祇奉靈駕時遷新邑烈與高陽王雍奉神主於洛陽遷光祿卿十九年大選百僚烈子

大同府志

卷之二十一

人物

二十一

登引例求進烈表引已素無教訓請乞黜落帝曰此乃有識之言不謂烈能辦此乃引見登進爲太子翊軍校尉又加烈散騎常侍封聊城縣開國子嘗歎曰烈之節槩不謝金曰碑也除領軍將軍從征荆沔加鼓吹一部景明二年正月初祭三公致齋於廟帝夜召烈將直閣六十餘人宣旨召咸陽王禧彭城王勰北海王詳衛送至帝前諸公各稽首歸政以烈爲領軍進爵侯自是常直禁中機密大事皆所參焉卒年六十五弟果嚴毅直亮有父兄之風自中散稍遷光祿大夫守尚書歷朔華并恒四州刺史果弟勁字鍾葵頗有武畧位沃野鎮將

封太原郡公

車路頭代人明元卽位拜散騎常侍賜爵宣城公加忠義將軍性無害每評獄處理常獻寬恕之議以此見重於朝帝亦敬納之當時功臣親厚莫及泰常六年卒諡忠貞

陳建代人祖渾道武時右衛將軍父陽尙書建以善騎射擢爲三郎稍遷下大夫從太武征討帝墮馬幾至不測建以身捍衛擊殺數人被十餘創帝壯之賜戶二十文成時賜爵阜城侯出爲幽州刺史孝文初徵爲尙書右僕射加侍中進爵趙郡公遷司徒進魏郡王太和九年大同府志

卷之二十一

人物

二十一

卒

陸俟代人少慧有策畧明元初襲爵爲給事典選部蘭臺事當官無所撓屈賜爵建業公拜冀州刺史考治功第一轉虎牢鎮大將復轉安定鎮大將遷懷荒鎮大將除散騎常侍從帝破涼州又渡河南畧地仍遷長安鎮大將杏城之捷遷內都大官復以功徵拜外都大官文成踐祚以子麗有定策勲進爵東平王卒年六十七諡曰成

陸馘俟長子多智有父風文成謂朝臣曰吾嘗歎其父智過其軀是復踰於父矣少爲內都下大夫每能逆曉人

意同事者無不愛之興安初賜爵聊城侯出爲相州刺史爲政清平抑強扶弱州中有德宿老以友禮待之者十人號曰十善又簡取諸縣彊門百餘人以爲假子令各歸家爲耳目於是發姦擿伏百姓以爲神明無敢劫盜者在州七年家至貧約徵爲散騎常侍乞畱者千餘人帝不許相州吏民大斂布帛以遺之馘皆不受人亦不取爲起佛寺名長廣公寺後襲爵改封建安王車駕北征詔爲選部尚書錄畱臺事延興四年卒諡曰貞子琇襲爵至河內太守

陸凱字智君琇弟謹重好學累遷至太子庶子給事黃門

大同府志

卷之二十一

人物

二十三

侍郎在樞要十餘年以忠厚見稱除正平太守在郡七年號爲良吏卒諡惠子暉字道暉與弟恭之並有時譽洛陽令賈正歎曰僕以老年更覩雙璧又嘗共候黃門郎孫惠蔚惠蔚謂諸賓曰不意二陸復在座隅暉仕至尚書右民三公郎恭之字季順歷任河北太守殷州刺史所在並有聲績著文章詩賦凡千餘篇子暉字仁崇通直散騎常侍寬字仁惠太子中舍人兄弟並有才品陸麗俟次子少以忠謹入侍太武親之賜爵章安子稍遷南部尚書文成立受心 之任朝臣無出其右興安初封平原王麗頻讓不聽 啟以讓父帝曰朕爲天下主

豈不能得二王封卿父子 以其父俟爲東平王麗尋
遷侍中撫軍大將軍司徒公領太子太傅麗好學愛士
常以講習爲業性至孝父憂毀瘠過禮和平六年療疾
於代郡溫泉聞文成諱欲赴左右止之曰王德望素重
姦臣若疾民譽慮有不測麗曰安有聞君父之喪慮禍
難遲回者遂便馳赴中忌見害獻文甚追惜焉諡曰簡
弟龍成有父兄之風歷官安南將軍青州刺史愛民恤
下百姓稱之

陸昕之字慶始麗孫風望端雅襲爵公尙主拜駙馬都尉
歷通直郎除散騎常侍出爲兗青二州刺史並有政績

大同府志

卷之二十一

人物

二十四

卒諡曰惠子子彰字明遠本希道子年十六出嗣事公
主盡禮襲爵東郡公歷行青冀滄瀛四州事甚有時譽
加以虛已納物人敬愛之除中書監卒諡文宣子彰崇
好道術曾嬰重疾藥中須桑螵蛸不忍害物遂不服其
仁恕如此

陸希道字洪度麗孫有風貌美鬚髯歷覽經史初拜中散
遷通直郎以軍功賜爵淮陽男拜諫議大夫參議新令
累遷前將軍郢州刺史甚有威畧轉平西將軍涇州刺
史卒官

陸雋俟族弟宜子獻文初侍御長拜侍中遷吏部尙書賜

爵安樂公甚見委任歷定相二州刺史政尚寬惠民吏
安定卒諡貞

羅結代人以翼衛功賜爵屈虵侯大武初累遷侍中外都
大官總三十六曹事年一百七歲精爽不衰帝以其忠
愨甚信待之因除長信卿年一百一十詔聽歸老賜大
甯東川爲居業并爲築城號羅侯城朝廷每有大事驛
馬詢訪焉年一百二十卒諡曰貞子斤力戰有功除散
騎常侍四部尚書後平涼州賜爵帶方公卒於長安鎮
都大將斤孫伊利以沉密恭勤稱由儀曹尚書出爲兗
州刺史善於撫導後除司農卿卒伊利子阿努忠實有

大同府志

卷之二十一

人物

二十五

智度位中散大夫善射有膂力太武時爲軍將數從征
伐有功官至范陽太守

伊跋代人少勇健走及奔馬善射力曳牛却行神靡初擢
侍郎轉三郎賜爵汾陽子太武將討涼州議者咸以無
水草諫惟司徒崔浩勸行跋曰涼州若無水草何得爲
國宜從浩言帝善之及克涼州大會於姑臧帝曰崔公
智計有餘吾亦不復奇之正奇跋所見能與崔同耳顧
謂浩曰跋智力如此終至公相帝欲以爲尚書跋辭曰
尚書務殷非臣愚所宜荷任若恩矜不已請參其次帝
賢之拜秘書監出爲東雍州刺史恩化大行累遷殿中

尚書征北大將軍賜爵河南公拜司空清約自守政舉大綱而已與司徒陸麗等並平尚書事大安五年卒孫貧生驍勇有膽氣累有戰功遂爲名將賜爵平城子後爲西道都督戰歿

乙瓌代人善騎射手格猛獸尚上谷公主拜駙馬都尉賜爵西平公從駕南征都督前鋒諸軍事每戰身先士卒勇冠三軍後爲西道都將卒諡曰恭子乾歸身長八尺有氣幹習書疏尤好兵法尚安樂公主除駙馬都尉侍中爲秦州刺史有惠政孝文時爲中道都將卒諡康

和其奴代人少有操行善射御初爲三郎以恭勤稱孝文

大同府志

卷之二十一

人物

二十六

時賜爵平昌公累遷尚書左僕射與河東王閭毗太宰常英等並平尚書事在官慎法不受私請遷司空加侍中後以事出爲定州刺史皇興元年卒諡曰宣

苟頽代人本姓若干父洛拔內行長頽性厚重清直武力過人擢爲中散小心謹敬從太武南征常先登陷陣賜爵建德男累遷司衛監洛州刺史抑疆扶弱人民畏威太和中歷侍中都曹尚書進河南公遷司空進河東王以舊老聽乘步挽杖於朝大駕行幸三川頽畱守京師卒諡僖頽從叔孤少以忠直稱明元卽位以定策功拜車騎將軍後除并州刺史不治產業死之日家無餘財

百姓追思之

薛彪子世居代祖聊城侯父歷并太二州刺史在治有聲
彪子姿貌壯偉明斷有父風初爲內行長典奏諸曹事
當官正直內外敬憚累遷開府徐州刺史多惠政百姓
便之沛郡太守邵安下邳太守張攀貪賂案之於法安
等誣彪子孝文曰此妄矣推案果虛太和十五年卒諡

曰文

費于代人祖峻廣阿鎮大將下邳公父郁燕郡太守于少
有節操起家內三郎以宿衛勤賜爵松陽男卒於懷州
刺史子萬位梁國鎮將太和中從駕南征渡淮戰歿

大同府志

卷之二十一

人物

二十七

尉元代人父目斤有勇畧位中山太守元善射爲羽林中
郎以匪懈見知稍遷駕部給事中賜爵富城男和平中
遷北部尚書進太昌侯天安元年拜開府都督徐州刺
史淮陽公太和初徵爲內都大官復出爲使持節鎮西
大將軍開府統萬鎮都將甚得民心進淮陽王聽乘步
挽杖於朝入爲侍中遷尚書令進司徒頻表乞身詔許
之元詣闕謝引見命升殿勞宴賜冠服孝文行養老禮
以元爲三老賜步挽一乘給上公祿養十七年疾帝親
省之卒年八十一諡景桓子羽有器望襲爵官至恒州
刺史羽弟靜寬雅有才識宣武時爲尚書左民郎中卒

封勅文人祖豆開府冀青二州刺史父湜侍御長勅文始光初爲中散稍遷西部尚書出爲鎮西將軍領護西藩校尉秦益二州刺史賜爵天水公嘗設奇兵掘重塹屢奏殊績天安元年卒

奚康生本姓達奚世居代後徙河南祖直柔元鎮將內外三都大官康生少驍武彎弓十石矢異常箭太和初攻陣康生爲前驅壯氣屢聞孝文因濟淮功假康生直閣將軍除征魯將軍封安武縣男出爲南青州刺史擒梁郁州徐濟詔授武衛將軍敗梁都督蕭宏出爲華州刺史頗有聲績歷涇相二州刺史徵拜光祿勳領右衛將

大同府志

卷之二十一

人物

二十八

軍卒追封壽張縣侯

朱瑞字元龍代郡桑乾人祖就沛縣令父惠行太原太守瑞長厚質直敬愛人士爲大行臺郎中遷黃門侍郎封陽邑縣公從駕幸河陽除侍中吏部尚書改封樂陵郡公仍侍中帝常謂侍臣曰爲人臣當須忠實至如朱元龍者朕待之亦不異餘人又爲青州大中正轉滄州除尚書左僕射西道大行臺卒太昌初追諡恭穆

樊子鵠代郡平城人父興平城鎮長史子鵠爲都督府倉曹參軍建義初拜晉州刺史封永安縣伯永安二年進中都縣公又兼尚書行臺政有威信尋徵授都官尚書

西荊州大中正兼右僕射進西陽郡公尚書如故出爲
殷州刺史歲旱勒有粟家分濟貧者并遣人牛易力多
種二麥比戶盈寧以母在晉陽求移鎮河南莊帝嘉之
除都督豫州刺史以功遷吏部尚書轉尚書右僕射加
驃騎大將軍開府典選後除兗州刺史子鵠先遣腹心
採察得失及至境太山太守彭穆參候失儀責讓穆并
數其罪狀州內震悚

綦儁字櫟顯代人徙居洛陽孝莊時累遷爲滄州刺史吏
人畏悅除太僕卿尋除御史中尉僕射賈顯度恃勲貴
於路排儁騶列倒儁忿見於色入奏之尋加散騎常侍

大同府志

卷之二十一

人物

二十九

驃騎大將軍左光祿大夫儀同三司封章武縣伯出爲
殷州刺史卒於州諡文貞

乙弗朗字通照家盛樂朗少有俠氣以善騎射稱孝莊時
以功封蓮勺子孝武授朗閤內大都督詔爲軍司先驅
靖路封長樂縣公卒於岐州刺史

山偉字仲才其先代人徙洛陽祖强美容貌身長八尺五
寸工騎射彎弓五石爲奏事中散授內行長父稚之位
太守偉師事營陵人王惠涉獵文史孝明初兼侍御史
累遷員外郎廷尉評名士郎修起居注僕射元順領選
表薦爲諫議大夫遷給事黃門侍郎封東阿縣伯孝靜

初除衛大將軍中書令卒諡文貞偉愛尚文史老而彌篤弟少亡撫寡訓孤同居二十餘載恩義甚至性不營產業身亡之後賣宅營葬士友歎愍之

宇文忠之河南洛陽人後居代都父侃卒於治書侍御史忠之涉獵文史釋褐太學博士天平初除中書侍郎勅修國史元象初兼通直散騎常侍爲尚書右丞卒

劉仁之字山靜羅辰元孫少有操尚涉書史頗工眞草書由御史累遷著作郎兼中書令出除西兗州刺史有當時之譽武定二年卒官諡曰敬

于簡字什門代人明元時爲謁者使馮跋畱居歷二十四

大同府志

卷之二十一

人物

三十

年勵節矢志終始不渝後送歸拜治書侍御史太武下詔褒美之

婁提代人獻文時爲內三郎獻文上賓提謂人曰尚安用活爲引佩刀自刺幾死文明太后詔賜帛二百匹

朱長生于提並代人孝文時長生爲員外散騎常侍與提俱以出使不屈辱歸拜長生河內太守提隴西太守並賜爵五等男

北齊

婁昭字菩薩代郡平城人武明 后之母弟也方雅正直有大度深謀腰帶八尺弓馬冠世爲中軍大都督封安

喜縣伯進濮陽郡公後轉大司馬遷司徒出爲定州刺史事委寮屬昭舉其大綱而已卒諡曰武追封太原王庫翟迴洛代人少有武力儀貌魁偉以功封順陽子累遷朔州刺史轉夏州刺史後進順陽郡王太寧初轉太子太師卒贈太尉

薛孤延代人少驍果有武力天保初賜爵都昌縣公以善戰常爲前鋒位至開府儀同三司

段琛字懷寶代人少有武用天保中開府儀同三司兗州刺史

范舍樂代人有武藝筋力絕人每從征伐多有克捷位東

大同府志

卷之二十一

人物

三十一

雍州刺史開府儀同三司封平舒侯

尉相願代人父標太寧初位司徒相願彊幹有膽畧武平

末開府儀同三司領軍大將軍

侯莫陳相代人七歲喪父號慕過人及長性雄傑天保初

累遷司空公進王又遷大將軍拜太尉公兼瀛州刺史

歷太保朔州刺史卒於州次子晉貴嚴重有文武幹畧

襲爵白水王武衛將軍開府儀同三司梁州刺史

張瓊字德連代人少壯健有武用神武時拜滄州刺史加

驃騎大將軍開府儀同三司卒贈司徒公子欣駙馬都

尉南鄭伯

劉世清代人武平時侍中開府儀同三司任遇與斛律孝卿相亞周慎謹密在孝卿之右

王峻字巒嵩靈邱人明悟有幹畧歷相府參軍賜爵北平男除營州刺史遷秘書監歷太僕卿都官尚書加開府儀同三司武平四年卒贈司空公

高寶寧代人武平末爲營州刺史鎮黃龍咸重其威信周武帝平齊遣使招慰不受范陽王紹義在中外寶寧上表勸進范陽王署爲丞相盧昌期據范陽起兵寶寧引紹義集兵數萬救之至潞河知周將宇文神舉屠范陽還據黃龍竟不臣周

大同府志

卷之二十一

人物

三十一

張華原字國滿代郡人少明敏有器度初爲齊神武驃騎府法曹參軍遷大丞相府屬深被親待恒令宣諭意旨周文據雍州神武使華原入關說焉周文謂華原曰若能屈驥足於此當共享富貴不爾命懸今日華原以死拒之乃得東還神武以華原久不返每歎惜之聞其來喜見於色累遷爲兗州刺史人懷感附盜匪寢息州獄先有囚千餘人華原科簡輕重隨事決遣至年暮惟有重罪者數千人各給假五日日期盡速還依期畢至先是州境數有猛獸爲暴自華原臨州忽有六駁食之咸以爲化感所致後卒官州人大小莫不號慕爲樹碑立

祠

北周

于謹字思敬代人栗磾六世孫性沉深有識量畧窺經史尤好孫子兵書魏太宰元天穆見之歎曰王佐才也孝閔踐阼進燕國公遷太傅太宗伯明帝令謹統軍授以方畧保定二年乞骸骨優詔不許三年詔謹爲三老固辭又不許武帝幸太學行養老乞言禮賜鐘磬一部又賜安車一乘天和三年卒年七十六諡曰文配享文帝廟廷謹有智謀善事上名位雖重愈存謙挹每朝參往來不過兩三騎朝廷軍國務多與謹決謹亦竭其智能

大同府志

卷之二十一

人物

三十三

故功臣中特見委信始終若一人無間言每誡諸子務存靜退子孫繁衍皆至顯達當時莫與比焉

達奚武字成興代人祖父並爲鎮將武少倜儻好馳射孝閔踐阼拜柱國大司寇武成初轉太宗伯進鄭國公保定三年遷太保出爲同州刺史天和三年轉太傅武居重位不持威儀行常單馬左右一兩人門不施戟或言其輕率武曰吾昔在布衣豈望富貴今日富貴不可頓忘疇昔武在同州時旱勅武祀華嶽嶽廟在山下常所祈禱武曰吾備位三公不能燮理陰陽使甘雨久絕不可同於衆人在常祀之所必須登峯展誠尋其靈奧時

武年逾六十攀藤而上稽首祈請晚卽藉草而宿夢白衣執武手曰快辛苦甚相嘉尙及旦雲霧四起澍雨露洽武帝璽書勞之卒年六十七諡曰桓

達奚震字猛畧武子少驍勇走及奔馬武成初進廣平郡公除華州刺史導民訓俗頗有治方秩滿代還爲百姓所戀天和三年拜柱國建德初襲鄭國公拜太宗伯震父常爲此職時論榮之宣政中出爲原州總管隋開皇初卒於家弟碁大象末益州刺史

獨孤信雲中人美容儀善騎射孝閔踐阼除太宗伯進封衛國公

大同府志

卷之二十一

人物

三十四

乙弗鳳代人位宮伯開府儀同三司

尉遲迴字薄居羅代人周初進位柱國大將軍改封寧蜀公子惇祐弟子勤皆以奮勇力戰著

尉遲綱字婆羅迴弟武成元年進封吳國公歷少傅大司空陝州總管卒諡曰武

梁椿字千年代人孝閔踐阼除華州刺史改封清陵郡公保定元年拜大將軍卒于位諡曰烈椿性果毅善於撫納所獲賞物分賜麾下故每踐疆場咸得其死力雅好儉素不營貲產時論以此稱焉

陸騰字顯聖代人明帝初陵眉等八州不靖騰討平之以

騰爲隆州刺史遷總管兵馬鎮防皆委統攝時蠻獠恃險無狀騰量山川形勢隨便開道莫不畏威請服所開之路多得古銘並是諸葛亮桓溫舊道鐵山獠抄斷內江路使驛不通騰進軍討之一日下其三城降附者三萬戶旣而徵騰入朝天和初信州蠻蠻據江硤詔騰討之所向摧滅又定巴蜀有功詔令樹碑記績焉四年遷江陵總管六年加柱國進爵郡公建德二年徵拜大司空尋出爲涇州總管宣政元年卒諡曰定子融字士傾最知名位至大將軍

賀若敦代人少有氣幹武成元年爲軍司馬保定五年累

大同府志

卷之二十一

人物

三十五

遷中州刺史鎮函谷建德初追諡曰烈

宇文盛字保興代人志力驍雄宣帝卽位拜上柱國大象中卒

伊婁穆代人孝閔踐阼進位驃騎大將軍進爵爲公除荊州刺史衛公直出鎮襄州以穆爲長史建德初復以爲荊州總管府長史入爲小司馬卒

竇熾字光成漢大鴻臚章之後徙居代熾性嚴明有偉畧美鬚髯身長八尺二寸少從范陽祁忻受毛詩左氏春秋通大義善騎射膂力過人武成二年拜柱國大將軍保定元年進封鄧國公天和中拜太傅熾朝之元老名

望素重軍國大謀常與參議進位上柱國宣政元年兼
雍州牧卒年七十八

竇毅字天武熾兄岳之子深沉有器度事親以孝聞孝閔
踐阼進爵神武郡公保定三年拜大將軍進位柱國歷
同州刺史蒲金二州總管加上柱國入爲大司馬卒年
六十四

庫翟峙本段匹磾之後徙居代峙少宏厚善騎射有謀畧
明帝初出爲益州刺史治尚清靜後徙宜州刺史天和
三年入爲少師表乞骸骨詔許之卒諡曰定

趙昶字長舒家於代昶聰敏有志節弱冠以材力聞明帝
大同府志
卷之二十一 人物
三十六
中以功進爵長道郡公明年徵拜竇部中大夫行吏部
卒

尉遲運綱子少彊濟志在立功明帝初進周城縣公保定
元年進驃騎大將軍出爲隴州刺史垂情撫納甚得時
譽遷左武伯中大夫尋加軍司馬武伯如故職兼文武
甚見委任進廣業郡公授右司衛以衛肅章門益火却
兵武帝嘉之授大將軍四年出爲同州刺史尋拜柱國
進盧國公轉司武上大夫總宿衛軍事宣帝卽位授上
柱國出爲秦州刺史卒於州諡曰忠

大同府志卷之二十一終

